



Jadual Pembacaan Khutbah Jumaat

Siri 12/ 2023 (Disember Tahun 2023)

تاریخ	تاجوق	ب
1 Disember 2023M/ 18 Jamadil Awwal 1445H	Pembangunan Lestari, Nikmatnya Disyukuri	1.
8 Disember 2023M/ 25 Jamadil Awwal 1445H	Tunaikanlah Zakatmu	2.
15 Disember 2023M/ 2 Jamadil Akhir 1445H	Menginsafi Hikmah Musibah	3.
22 Disember 2023M/ 9 Jamadil Akhir 1445H	Siapa Lelaki Sejati	4.
29 Disember 2023M/ 16 Jamadil Akhir 1445H	Sediakan Payung Sebelum Hujan	5.
Khutbah Kedua		

دبیایای:



زكاة فولاو فینغ

دترییتکن:



جابتن حال إحوال اکام اسلام فولاو فینغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Sediakan Payung Sebelum Hujan

29 Disember 2023M / 16 Jamadil Akhir 1445H

الْحَمْدُ لِلَّهِ الَّذِي كَتَبَ عَلَى خَلْقِهِ الْإِعْدَامَ وَالْفَنَاءَ، وَتَفَرَّدَ وَحْدَهُ بِالِدَّوَامِ وَالْبَقَاءِ.

أَشْهَدُ أَنْ لَا إِلَهَ إِلَّا اللَّهُ يُبْتَلَى عِبَادَهُ الْمُؤْمِنِينَ بِمَا شَاءَ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ الَّذِي يُضَاعَفُ أَجْرُهُ بِالدَّرَجَاتِ الْعُلَى.

وَالصَّلَاةُ وَالسَّلَامُ عَلَى سَيِّدِنَا مُحَمَّدٍ الْحَبِيبِ الْمُصْطَفَى، وَالنَّبِيِّ الْمُجْتَبَى،
وَعَلَى آلِهِ وَالصَّحْبِ وَمَنْ سَارَ عَلَى نَهْجِهِمْ وَاقْتَفَى.

أَمَّا بَعْدُ؛ فَاتَّقُوا اللَّهَ تَعَالَى وَأَطِيعُوهُ وَلَا تَعْصُوهُ وَمَنْ يَتَّقِ اللَّهَ يَجْعَلْ لَهُ مَخْرَجًا.

PARA TETAMU JUMAAT YANG DIKASIHI SEKALIAN,

Marilah kita mempertingkatkan ketakwaan kepada Allah **سُبْحَانَهُ وَتَعَالَى** dengan mematuhi segala suruhan-Nya dan menjauhi segala larangan-Nya. Mudah-mudahan kita semua sentiasa dalam rimbunan maghfirah-Nya dan sentiasa terpelihara daripada sebarang perbuatan yang mengundang kemurkaan-Nya.

Selain itu, khatib juga ingin mengingatkan sidang hadirin sekalian, agar



memberi fokus dan mendengar dengan bersungguh-sungguh khutbah Jumaat ini. Janganlah leka bermain gajet, tidur dengan sengaja atau berbual-bual kerana perbuatan-perbuatan tersebut bertentangan dengan adab mendengar khutbah. Mimbar pada hari ini akan menyentuh dan membicarakan khutbah bertajuk: **“Sediakan Payung Sebelum Hujan.”**

SIDANG JEMAAH YANG DIMULIAKAN ALLAH سُبْحَانَهُ وَتَعَالَى,

Hujan yang turun ke bumi, berkialauan bagaikan mutiara, melalui titisan-titisan halus membuktikan kehebatan Allah. Hujan merupakan satu rahmat daripada Allah سُبْحَانَهُ وَتَعَالَى tetapi ada ketika ia boleh menjadi asbab azab daripada-Nya.

Dunia indah yang diciptakan Allah ini, penuh dengan keseimbangan dan kesempurnaan. Hanya mereka yang dikurniakan dengan pandangan mata hati yang bersih akan mampu merasakan kebesaran dan keagungan Allah سُبْحَانَهُ وَتَعَالَى. Lantaran itu, berbahagialah, insan-insan yang dikurniakan Nurani yang bersih lalu memancarkan sinar takwa dalam kehidupan seharian.

Muka bumi ini merupakan suatu hamparan yang sangat luas, yang penuh liku dan ranjau ujian. Lumrah kehidupan di dunia, orang-orang yang beriman akan diuji oleh Allah, bagi menentukan sejauh mana tahap neraca keimanan dan tahap kesabaran manusia ketika mengharunginya. Firman Allah dalam surah al-Mulk ayat kedua:

الَّذِي خَلَقَ الْمَوْتَ وَالْحَيَاةَ لِيَبْلُوَكُمْ أَيُّكُمْ أَحْسَنُ عَمَلًا وَهُوَ الْعَزِيزُ الْغَفُورُ ﴿١٠﴾

Maksudnya: “Dialah yang menjadikan mati dan hidup untuk menguji kamu bahawa sesiapa antara kamu yang lebih baik amalannya. Dia Maha Berkuasa (membalas amalan kamu) lagi Maha Pengampun (bagi orang yang bertaubat).”

SIDANG JEMAAH YANG BERBAHAGIA,

Allah **سُبْحَانَهُ وَتَعَالَى** menurunkan kadar hujan yang sesuai mengikut perhitungan ke atas setiap juzuk permukaan muka bumi ini. Dalam Islam, penciptaan hujan juga merupakan kurniaan dan hikmah yang sangat luar biasa daripada Allah **سُبْحَانَهُ وَتَعَالَى** untuk kita sama-sama renungi dan fahami. Ini bertepatan dengan firman Allah dalam surah az-Zukhruf ayat 11:

وَالَّذِي نَزَّلَ مِنَ السَّمَاءِ مَاءً بِقَدَرٍ فَأَنْشَرْنَا بِهِ بَلْدَةً مَّيْتًا كَذَلِكَ تُخْرَجُونَ ﴿١١﴾

Maksudnya: “Dan Dia yang menurunkan hujan dari langit menurut kadar tertentu lalu Kami menghidupkan dengannya negeri yang kering tandus itu. Demikian itulah pula kamu akan dikeluarkan (hidup semula dari kubur).”

SIDANG JEMAAH YANG BERBAHAGIA,

Setiap tahun, negara kita dilanda fenomena musim tengkujuh yang biasa terjadi terutamanya sekitar bulan November dan Disember.

Jabatan Meteorologi Malaysia mendedahkan bahawa fenomena La Nina masih boleh berlaku lagi dengan kebarangkalian 91% tertumpu di negeri-negeri Pantai Timur, negeri Utara Semenanjung dan juga di pendalaman Sabah dan Sarawak sehinggalah awal Januari.

Jika dahulunya, bencana banjir boleh dijangka masanya berlaku seperti di hujung tahun, namun bencana banjir boleh berlaku pada bila-bila masa sahaja, tanpa mengikut masa dan tempat kerana perubahan iklim dunia yang amat ketara.

Persoalannya, apakah langkah-langkah pencegahan yang terbaik boleh dilaksanakan bagi menangani masalah ini? Apakah ibrah serta panduan berkesan untuk kita semua dalam menghadapi bencana banjir?

SIDANG JEMAAH YANG DIMULIAKAN,

Masih terngiang-ngiang peristiwa menyayat hati yang dilaporkan oleh media, kisah seorang wanita sarat yang mengandung cuba menyelamatkan ibu mertuanya yang uzur dan terbaring, lalu terkorban keduanya. Rumah yang didiami hilang sekelip mata, ranap menyembah bumi, hilang entah ke mana, akibat bencana besar banjir yang berlaku di Kampung Iboi, Baling, Kedah.

Inilah antara rentetan peristiwa yang dapat kita renungi dan ambil pengajaran darinya.

SIDANG JEMAAH YANG BERBAHAGIA,

Berdasarkan kepada Laporan Khas Impak Bencana Malaysia tahun 2021 yang dikeluarkan oleh Jabatan Perangkaan Malaysia, dan Pengurusan Bencana Negara (NADMA), banjir besar pada Disember 2021 yang membadai Malaysia telah menyebabkan negara ini kerugian hampir 6.1 bilion ringgit Malaysia. Ia melibatkan kemusnahan kediaman, kerosakan kenderaan dan aset keseluruhan 80,000 mangsa banjir di negara ini.

Ingatlah sentiasa, walau secanggih dan sehebat manapun kepakaran, keupayaan mahupun teknologi manusia, ia tidak akan sesekali dapat melepasi batasan ilmu Allah **سُبْحَانَهُ وَتَعَالَى**. Dalam konteks pertimbangan Islam, kita hendaklah berusaha, berdoa dan bertawakkal kepada Allah yang Maha Kuasa.

SIDANG JEMAAH YANG DIMULIAKAN,

Justeru, mimbar pada hari ini ingin memfokuskan persediaan menghadapi banjir bagi mewujudkan nilai-nilai kesedaran yang tinggi kepada segenap lapisan masyarakat, berwaspadalah dalam kesiapsiagaan menghadapi musibah banjir, sekaligus akan dapat menyelamatkan nyawa dan harta.

Antara Langkah awal yang boleh dibuat:

Pertama, mengatur barangan keperluan kecemasan yang betul iaitu menyediakan beg khas bencana yang dilengkapi dengan kit solat, ubat-ubatan, wisel, lampu suluh, bateri pengecas telefon dan sebagainya.

Kedua, menyimpan terlebih dahulu barangan berharga, dokumen-dokumen dan sijil-sijil yang penting sebagai persediaan awal bagi mengelakkan ia hilang akibat arus deras banjir yang melanda.

Antara Langkah terbaik **seterusnya**, adalah dengan menyelamatkan perkakasan elektrik dan perabot rumah dengan meletakkannya di tempat yang lebih tinggi agar kemusnahan dan kerosakan dapat dielakkan.

Setiap ahli keluarga perlu diingatkan agar apabila banjir sedang berlaku, tindakan tepat adalah dengan menyelamatkan diri dan keluarga terlebih dahulu. Apabila arahan pemindahan dikeluarkan oleh pihak berkuasa, janganlah cemas dan ikutlah arahan pihak keselamatan.

MUSLIMIN YANG DIRAHMATI ALLAH,

Pihak berwajib dan pihak berkuasa tempatan juga perlu membuat pemantauan dan penyelenggaraan sistem pam air berkala dan juga pembersihan sistem perparitan dan sungai yang konsisten, komprehensif dan bersistematik bagi mengurangkan punca dan kesan banjir.

Semangat kebersamaan segenap lapisan masyarakat dalam menghulurkan bantuan kepada mangsa banjir adalah dituntut, dari segi tenaga, masa, mahupun harta kerana itulah kunci dan kekuatan ummah.

Ini selari dengan bidalan lama, “**bulat air kerana pembentung, bulat manusia kerana muafakat.**” Ini juga bertepatan dengan hadis yang diriwayatkan oleh Imam Al-Bukhari, bahawa Rasulullah ﷺ bersabda:

إِنَّ الْمُؤْمِنَ لِلْمُؤْمِنِ كَالْبُنْيَانِ، يَشُدُّ بَعْضُهُ بَعْضًا " وَشَبَّكَ أَصَابِعَهُ."

Maksudnya: "Sesungguhnya orang mukmin bagi seorang mukmin yang lain adalah umpama sebuah bangunan kukuh yang saling melengkapi. Lalu Baginda menggenggam tasybik (تَشْبِيْكَ) (menggenggam sambil menyilang jari)"

SIDANG JEMAAH YANG DIRAHMATI ALLAH,

Mengakhiri khutbah, renungkan beberapa kesimpulan sebagai panduan kita bersama:-

Pertama: Bencana banjir adalah ujian untuk meningkatkan kualiti keimanan dan ketakwaan kepada Allah سُبْحَانَهُ وَتَعَالَى.

Kedua: Musibah banjir adalah salah satu jalan untuk kita bermuhasabah.

Ketiga: Semangat kebersamaan dan nilai kasih sayang wajar disuburkan sepanjang masa bagi membina masyarakat penyayang.

Marilah bersama-sama kita renungi firman Allah dalam surah al-Baqarah ayat 156:

الَّذِينَ إِذَا أَصَابَتْهُمْ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاجِعُونَ ﴿١٥٦﴾

Maksudnya: “(lailu) orang yang apabila ditimpa musibah, mereka berkata: “Sesungguhnya kami kepunyaan Allah dan kepada Allah jualah kami kembali.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.



Khutbah Kedua Bulan Disember

2023M/ 1445H

الْحَمْدُ لِلَّهِ عَلَى الْآلَاءِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

[الأحزاب: 56]

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Khatib juga mengambil kesempatan ini untuk menyeru para jemaah sekalian agar terus memberikan sokongan padu tanpa berbelah-bagi kepada penduduk Palestin yang sedang dizalimi oleh Regim Zionis melalui serangan tanpa henti di Gaza dan Tebing Barat.



Kita mungkin tidak mampu mengangkat senjata, tetapi kita masih mempunyai kekuatan daripada aspek kewangan. Infakkanlah sebahagian rezeki untuk membantu mereka yang ketika ini berada dalam keadaan yang amat menyedihkan serta menjalani kehidupan yang sukar. Selain itu, gunakanlah senjata paling ampuh yakni DOA. Semoga Allah **سُبْحَانَهُ وَتَعَالَى** menganugerahkan kejayaan, keselamatan dan kesejahteraan buat seluruh umat Islam serta rakyat Palestin khususnya. Semoga bumi Palestin kembali aman dan makmur di bawah rahmat Allah **سُبْحَانَهُ وَتَعَالَى**.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرِّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً
يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٥﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ
عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٦﴾